

Covid-19: 22 kes baru, 59 sembuh, tiada kematian

Malaysiakini

17 May 2020

Kementerian Kesihatan (KKM) memaklumkan 59 pesakit Covid-19 pulih dan dibenarkan pulang hari ini, menjadikan jumlah kes sembuh setakat ini berjumlah 5,571, atau 80.8 peratus daripada jumlah keseluruhan kes.

Pada masa sama, terdapat 22 kes baru dilaporkan setakat pukul 12 tengah hari tadi, menjadikan jumlah kes setakat ini sebanyak 6,849 kes, dengan 1,210 daripadanya ialah kes aktif.

"Ingin dimaklumkan daripada 22 kes baru yang dilaporkan, lima adalah kes import yang mendapat jangkitan di luar negara, manakala 17 kes adalah penularan tempatan di mana sembilan kes melibatkan bukan warganegara," kata Ketua Pengarah Kesihatan Dr Noor Hisham Abdullah dalam sidang media di Putrajaya hari ini.

Sebanyak 13 pesakit kini dirawat di Unit Rawatan Rapi (ICU), dengan tujuh daripadanya memerlukan bantuan pernafasan.

Noor Hisham juga memaklumkan tiada kes kematian baru yang dilaporkan, menjadikan angka korban akibat Covid-19 kekal sebanyak 113 orang, iaitu 1.64 peratus daripada jumlah keseluruhan kes.

Copyright © 1999-2012 Mkini Dotcom Sdn. Bhd

Source: <https://www.malaysiakini.com/news/526099>